



Broj: 01/2-50-3-2-18/12  
01,02,03,03,/11-05-1-94/12  
Sarajevo: 3. 5. 2012.

## ZABILJEŠKA

### sa sastanka članova Komisije za vanjske poslove PDPSBiH s delegacijom Grupe prijateljstva njemačkog Bundestaga s PSBiH

Sastanak s delegacijom Grupe prijateljstva njemačkog Bundestaga s PSBiH održan je 3.5.2012. U ime Komisije za vanjske poslove sastanku su prisustvovali: predsjedavajući Komisije za vanjske poslove Mirza Kušljugić, drugi zamjenik predsjedavajućeg Zvonko Jurišić i član Mladen Ivanković Lijanović. U delegaciji Grupe prijateljstva njemačkog Bundestaga s PSBiH bili su: Marieluise Beck, Thomas Nord, Gerold Reichenbach, Steffen-Claudio Lemme, Ewald Schurer i Eva Mehlich. Iz Ambasade SR Njemačke u BiH sastanku su prisustvovali Nj.E. Ulrike Knotz, ambasadorica SR Njemačke u BiH, i Christiana Markert, zamjenica ambasadorice.

**Mirza Kušljugić** je na početku pozdravio delegaciju Grupe prijateljstva njemačkog Bundestaga, poželio im dobrodošlicu u ime Komisije za vanjske poslove Predstavničkog doma PSBiH i izrazio očekivanje da će delegacija Grupe prijateljstva njemačkog Bundestaga imati priliku da dobije dovoljno informacija o stanju u Bosni i Hercegovini. On je ponovio u ime Komisije za vanjske poslove da su prioriteti Bosne i Hercegovine evroatlantske integracije, regionalna saradnja i ekonomska diplomatija. Istakao je da nije potrebno ponavljati da SR Njemačka u svim od ovih prioriteta zauzima itekako važno mjesto i predstavlja jednog od ključnih partnera na željenom putu Bosne i Hercegovine u konačnom prevazilaženju političkih problema i ekonomskom oporavku koji je neophodan preduslov za stabilizaciju stanja. S tim u vezi Komisija je spremna i voljna da saraduje s odgovarajućim tijelima Parlamenta SR Njemačke i da saradnju koja je započeta prije 20 godina kada je BiH bilo najteže nastavi u nekom novom pravcu koji podrazumijeva normalnije stanje. Mirza Kušljugić predstavio je Zvonka Jurišića, drugog zamjenika predsjedavajućeg, Mladena Ivankovića Lijanovića, člana Komisije, i Merdžanu Iglicu, sekretara Komisije, te dao riječ Marieluise Beck.

**Marieluise Beck**, koja je predvodila delegaciju Grupe prijateljstva njemačkog Bundestaga s PSBiH, predstavila je ostale članove delegacije i kazala da je Grupa prijateljstva njemačkog Bundestaga s PSBiH bh. lobi. Kazala je da je delegacija Grupe prijateljstva u proteklih nekoliko sati na sastancima koje je imala mnogo razgovarala o tome šta je to što dijeli Bosnu i Hercegovinu i dodala da se takve stvari ne smiju skrivati. Postavila je pitanje članovima Komisije da li u Komisiji za vanjske poslove preovladava zajednički stav o onome što Komisija zastupa i da li je to, ustvari, poruka vanjske politike bez obzira ko kojem entitetu i naciji pripada.

**Mirza Kušljugić** kazao je da su prioriteti vanjske politike bili osnova prilikom formiranja većine u Vijeću ministara BiH, što znači da većina, a u nekim pitanjima i cijeli Parlament, dijeli ta opredjeljenja, dakle uglavnom evroatlantske integracije i regionalna saradnja. On misli da u Parlamentarnoj skupštini BiH nema parlamentarca koji bi eksplicitno rekao da Bosna i Hercegovina ne treba da pristupi evropskim integracijama ili Evropskoj uniji. Dodao

je da u BiH nema saglasnosti o tome kako organizirana Bosna i Hercegovina treba da postane članica Evropske unije. Kazao je otvoreno da je ovih dana vrlo aktuelna diskusija i problemi koje imamo u vezi s programiranjem IPA fondova, da ovih dana čujemo da je Bosna i Hercegovina državna zajednica, kao što je bila državna zajednica Srbije i Crne Gore, a ne država i da na tom konceptu treba programirati i saradnju s Evropskom unijom što znači da entiteti treba odvojeno da programiraju projekte i pregovaraju s Briselom o pomoći i čak da imaju i ekskluzivno pravo za odobravanje projekata kojih se, po prirodi stvari, po aquisu, nekih 30 % događa i rješava na nivou Bosne i Hercegovine.

**Marieluise Beck** pitala je ko, ustvari, zagovara takav koncept i kakav je stav Federacije BiH o tom pitanju.

**Mirza Kušljugić** odgovorio je da takav koncept direktno zagovara Vlada Republike Srpske. Kazao je da je stav Federacije BiH da je to već dogovoreno u konceptu koordinacije koji već postoji kao mehanizam i da, ako želimo da mijenjamo mehanizam, onda treba da diskutujemo kako da ga promijenimo jer je mehanizam koordinacije između države i dva entiteta već dogovoren. On je dodao da želi biti potpuno jasan i kazao da je oko 70 % provođenja aquisa na entitetskom nivou, ali je, po važećem ustavu, barem 30 % provođenja plus koordinacija na nivou države Bosne i Hercegovine. Svaki program i projekat je, prije nego što počne provođenje, podložan odobravanju Komisije za vanjske poslove, ali povremeno imamo keriranje novih realnosti i moguće je da BiH neće uspjeti ove godine do roka u junu napraviti prijedlog projekata za IPA fondove za 2009. godinu i da ćemo ponovo dospjeti u probleme s Evropskom komisijom. Mirza Kušljugić je također istakao da postoji određena tendencija tehnokratskog pristupa predstavnika Evropske komisije, a to je insistiranje na nekim kompromisima koji nemaju uporište u ustavu i zakonu ili pak prihvatanje nekih termina gdje se prvi put i u nekoj zvaničnoj komunikaciji Evropske komisije pojavio termin državna zajednica Bosne i Hercegovine. On je dodao da je ovo sigurno političko pitanje i da o njemu treba raspravljati na političkim forumima.

**Gđa Ulrike Knotz**, ambasadorica SR Njemačke u BiH, kazala je da isključuje da je neko od odgovornih u Evropskoj komisiji koristio termin državna zajednica Bosne i Hercegovine i dodala da misli da su odgovorni ljudi u Evropskoj komisiji svjesni političkog značaja koji imaju IPA programi, te da se ovdje ne radi samo o tehničkom nego i o političkom pitanju.

**Ewald Schurer**, član delegacije, kazao je da je u današnjim razgovorima s Renzom Davidijem, zamjenikom šefa Evropske delegacije u BiH, gosp. Davidi tvrdio upravo suprotno, tj. da je preduslov za bilo kakvu vrstu razgovora, vezano za EU integracije, da imamo jasnog partnera i sagovornika a to je jedna država, ne dva njena dijela nego jedna država.

**Mirza Kušljugić** izrazio je zadovoljstvo ovim odgovorom i dodao da se te informacije mogu provjeriti, te da 7. juni nije daleko i da mi moramo dostaviti projekte za IPA fondove. Ono što je bitno za Bosnu i Hercegovinu su signali koji dolaze u retorici iz Brisela i iz Berlina, kazao je Kušljugić i dodao da smo mi s posebnim zadovoljstvom primili informaciju o posjeti Grupe prijateljstva iz Bundestaga. Kazao je da misli da i na ovom nivou treba imati komunikaciju jer je donekle slobodnije kada parlamentarci, i pozicija i opozicija, razgovaraju o osjetljivim političkim pitanjima o kojima pak vlade ili ne mogu ili imaju drugačiji okvir kada o tome razgovaraju.

**Marieluise Beck** nadovezala se i kazala da iz ovih riječi može razaznati određenu uznemirenost vezanu za pitanje koliko je, ustvari, čvrsta zapadna zajednica u svom stavu o održivosti Bosne i Hercegovine. Ona je podsjetila na posjetu savezne kancelarke Angele Merkel Beogradu prije otprilike tri mjeseca, gdje je ona na jedan veoma jasan način prenijela poruku da se Beograd mora pomiriti s tim da je Kosovo izgubljeno što ne znači da Kosovo mora biti priznato, ali to je jasno značilo da neće doći do novih pomijeranja granica. Gđa Beck kazala je da je gosp. Kušljugić u pravu kada smatra da se u Njemačkoj u javnim

diskusijama postavlja pitanje koliko je zaista egzistentna Bosna i Hercegovina. Dodala je, međutim, da je Njemačkoj i u njemačkom parlamentu sasvim jasno i da su svi svjesni toga da bi bilo kakva promjena granica ovdje značila novi sukob.

**Mirza Kušljugić** je na to kazao da nije mislio na teritorijalnu reorganizaciju već da je govorio o objektivnom kapacitetu institucija BiH da funkcioniraju. Mi nikako ne možemo da uspostavimo taj nivo subsidijarnosti da imamo tačno definiranu vertikalnu odgovornost i ovlaštenja između kantona, entiteta i države Bosne i Hercegovine, kazao je Kušljugić i dodao da stranka kojoj on pripada i kolege koje su tu iz drugih stranaka, i koje čine zajedničku platformu, misle da je prioritet svih prioriteta da Bosna i Hercegovina odlučno krene prema evroatlantskim integracijama. Zbog toga mislimo da su ovi prioriteti i stavljanje diplomatije u funkciju ekonomskog oporavka zemlje pravi prioriteti Bosne i Hercegovine. To je, ustvari, i program koji ova komisija planira realizirati, kazao je Mirza Kušljugić.

**Mladen Ivanković Lijanović** uključio se u raspravu ustvrdivši da je u Bosni i Hercegovini na snazi protektorat, da imamo visokog predstavnika jer Bosna i Hercegovina još nije sposobna da bude država. Šest godina je prošlo od tzv. aprilskog paketa gdje je BiH trebalo da dobije kapacitet države, ali da, nažalost, domaći političari nisu smogli snage to da urade. Visoki predstavnik koji je trebalo da odigra ulogu da nam pomogne da to uradimo nije odigrao svoju ulogu i sad šest godina imamo status quo. Gosp. Lijanović je to nastojao slikovito prikazati kao kad umjetnik hoće da pravi sliku, on najprije treba da ima okvir. Isto su tako, da bi se izgradilo jedno društvo, potrebni okviri da bi se slika tog društva stvarala, a nažalost, mi se šest godina ne možemo dogovoriti oko tog okvira i nemamo pomaka u daljem radu na toj slici. On je još dodao da je član Komisije za izmjenu Ustava u predmetu Sejdić i Finci i da to traje tri-četiri godine i može još toliko trajati, a mi se nećemo dogovoriti i to treba biti jasno. Stojeći u mjestu pored međunarodne zajednice koja nam govori da želi Bosnu i Hercegovinu, a istovremeno govori da će prihvatiti sve što se strane u BiH dogovore ne čineći ništa da nam pomogne oko stvari o kojima se ne možemo dogovoriti, mi propadamo i za deset – petnaest godina možemo imati disoluciju Bosne i Hercegovine, kazao je Mladen Ivanković Lijanović. Istakao je da nam treba visoki predstavnik da nam pomogne da napravimo okvir da bi mogli praviti sliku unutar tog okvira.

**Marieluise Beck** kazala je da u Njemačkoj imaju dvije različite filozofije u vanjskoj politici. Filozofija koju neki zastupaju jeste da je nakon 15 godina zaista krajnje vrijeme da se prema BiH ne ponašamo kao prema maloljetniku i da se odgovornost jednostavno mora vratiti onima koji su odgovorni, jer inače će se ti odgovorni smjestiti u svoje fotelje i reći "zašto bi mi odgovarali kad niko od nas ne traži odgovornost". To je bila filozofija Christiana Schwarz-Schillinga koji je zastupao tezu da se ova zemlja ne posmatra kao protektorat. Druga filozofija je ona koja zastupa mišljenje da je i međunarodna zajednica odgovorna za Dejtonski sporazum koji nije funkcionalan i da bi trebalo mnogo odlučnije postupati i donositi odluke u korist Bosne i Hercegovine. Međutim, ne postoji više snaga unutar međunarodne zajednice za to. Dakle, trenutno je najrealističnija i jedina ponuda koja postoji na tržištu ta da Evropska unija sa svojim instrumentima koje ima na raspolaganju Bosni i Hercegovini stavi na sto te instrumente, ta pomagala koja ima i da tako vuče Bosnu i Hercegovinu sa sobom u pravcu Evropske unije. Možda je to nekada veoma gorka istina kada vidite da je realnost dosta ograničena i ako to gledate sa aspekta ravnopravnosti, ko je odgovoran za blokadu i u kojem pogledu, ali to je realnost s kojom se i mi konfrontiramo, kazala je gđa Marieluise Beck.

**Ewald Schurer** pitao je da li visoki predstavnik remeti na neki način svijest ovih šest političkih stranaka koje imaju moć u svojim rukama vezano za razvoj ove zemlje u pravcu Evropske unije.

**Mirza Kušljugić** odgovorio je da je visoki predstavnik zadnja kočnica koja je još uvijek potrebna ovoj zemlji i dodao da nije čuo da je visoki predstavnik u zadnjih šest mjeseci išta

uradio. Istakao je da ponuda Evropske unije da vuče Bosnu i Hercegovinu u pravcu EU nije loša, te da će BiH biti na granici Evropske unije od jula iduće godine, kada Hrvatska postane članica. Ono što je bilo najavljavano da će novi specijalni predstavnik Evropske unije biti nova snaga koja će gurati BiH prema EU nije se dogodilo i to treba reći, kazao je Mirza Kušljugić i dodao da je odgovor vrlo jednostavan, a taj je da šestorki niko ne smeta. Također je kazao da u principu to nije koalicija u pravom smislu riječi, nego skup stranaka koje su se okupile oko jednog minimalnog zajedničkog stava da bi jednostavno deblokirale proces. To nije neka koherentna politička koalicija i može se očekivati s vremena na vrijeme i sve češće da ta koalicija ima probleme, kao što ih ima sada sa usvajanjem budžeta, zaključio je Kušljugić.

Za riječ se javio i **Zvonko Jurišić** i kazao da je u Bosni i Hercegovini prisutna filozofija dejtonske Bosne i Hercegovine i da mi imamo današnju Bosnu i Hercegovinu koja ni u kojem slučaju nije želja naroda i građana Bosne i Hercegovine i zbog toga u Ustavu koji je produkt međunarodne zajednice iz '95. godine imamo diskriminirajuće odredbe pa danas imamo problem "Sejdić-Finci" i ko god bi tužio BiH dobio bi je na sudu pravde u Strazburu, ustvrdio je Jurišić.

Dodao je da u Bosni i Hercegovini imamo i diskriminaciju prema narodima BiH te da on kao pripadnik hrvatskog naroda ili pak neko iz bošnjačkog naroda u slučaju da živi na prostorima Republike Srpske ne bi mogao biti kandidat niti za Dom naroda niti za člana Predsjedništva BiH. Pripadnici srpskog naroda koji žive na prostoru Federacije BiH isto tako ne mogu biti kandidati, a oni koji pripadaju nacionalnim manjinama bez obzira gdje žive u BiH ne mogu biti kandidati i zato imamo ovaj problem "Sejdić-Finci". To je vrlo krupan problem u BiH i ako tome dodamo još da su 2000. i 2001. godine doneseni ustavni amandmani za koje je garant trebalo da bude visoki predstavnik, o konstitutivnosti naroda na prostoru cijele Bosne i Hercegovine, ta odluka Ustavnog suda i visokog predstavnika nije provedena i to još dodatno otežava ovu situaciju, kazao je Zvonko Jurišić. Istakao je da je visoki predstavnik trebalo da bude garancija da će se provesti svi aneksi Dejtonskog mirovnog sporazuma, a najbitniji aneks 7 nije uopće proveden, jer se nije desio povratak i međunarodna zajednica je priznala etnički očišćenu Republiku Srpsku u koju se nije vratilo preko 400.000 Hrvata i Bošnjaka. Da se to desilo, danas u Parlamentu BiH ne bi bio problem entitetsko glasanje koje koči procese prema evroatlantskim integracijama, kazao je na kraju Zvonko Jurišić.

**Marieluise Beck** je na kraju izrazila očekivanje da će iduće godine doći bolje vijesti iz Bosne i Hercegovine.

**Mirza Kušljugić** je na to izrazio nadu da će se bolje vijesti čuti već ove godine. Zahvalio je delegaciji Grupe prijateljstva njemačkog Bundestaga i posebno gđi Beck na kontinuiranom interesu i pomoći BiH i poželio im ugodan nastavak posjete.

SEKRETAR KOMISIJE

Merdžana Iglica

Dostavljeno:

- članovima Komisije za vanjske poslove PDPSBiH
- članovima Komisije za vanjsku i trgovinsku politiku, carine, saobraćaj i komunikacije Doma naroda PSBiH
- Ministarstvu vanjskih poslova BiH
- a/a